

Toyari goróiyá
Zulúm, Sótma óla sab ar húdkúçittu basar baabte
Wasael or Senthar
Mazór Elaka, 2023

Telifún: 72 82 20 05
Taaluk: rvts@stolav.no




www.rvts.no

MAA BAFORLLÁ
FUAÍN, LARÁI AR DAÁDÁI



ZUBAN: RUHÁINGGA

SPRÅK: ROHINGYA



Laráir ar dáдайózzoría fuaindór uore asór

Becabicí fémlí ar fuaindór uore laráir asór fore ar dáí zagoi fórer. Bazumottó decottú baáre neli zagoi fóré zíanottú bót bosór lage Norway aíte. Femli ókkól nizer decót óo refuji óiza, ar lagatar lorálori, ocantir ar be-mahafúz zindigi gorá foré. Bót fuaindé toklifor ar mockil ziníc ókkól lot faiyé. Dadaí, nizer fémlittú ar nizer hefazot gorédé manúccottú duré zaayó fuaindóllá becí mockil óo.

Fémliwá ehón ekkán caántir decót ailéo aagor dukkún foórái nózaibó. Janor faná saiboillá aiccé, lékín tará nozánédé ki óibó, hétollá tarállá becí mockil óo. Hítara ki Norway taí faríbo ne? Hítarálla ki ekkán noya ar gom zindigír acá asé ne? E habossánót larai ar dadáir loi fuaindór ki taluk acé ar fuaindóré ki asór górébó hiinór baabote forí faribá.



- Fuaindé añkító sailé añkító doo. Ar añikkédé sóbi hiin ekku fúañti soo.
- Fuaindóré kissá hoitó ar gaan gaitó doo. Boro fuaindé nizer sinta, tarik ar hotá loí dhaíri lekí fare.
- Fuaindóré tuñi gorédde hiin gom ar tuñi fosónd goródé híyan dahó.
- Fuaindóré numaz foraddó ar maa bafor fúañti dormiyó maháfilot corík goró.
- Fuaindóttú héfázót biccác gorí farédé boró manúc ókkól laibó. Maa bafottú fuaindóré sóñlár kaabeliyot homi zailé fuaindór gaar haalot toraturi hóraf oizái. Hétolla dekbal gorouyattú hítarar gaar ar demakor sehétór sasita gora foríbo ar hítarattú zorurot oilé tuade modot hin díba.
- Gom acaá diyar kucíc goró. Zetúkkún maa baf gom acaá díbá, canti, héfazot ar fuaindór zorurotor kial rakíbá, hetúkkún fuainde bálá gorí taí faribó. Monot raikkódé, honó maa baf náidé, ziné hámicá fuaindór zozurotéré bálá górí fura gorí faredé, lékín fuaindóré fura dinot zín lage hiin fura goríbóllá ekkán moksót tákoon zorurí.

Kessú maa baf dorai nize nize hañda cúru góre, lékín itará fuaindóré bordac goré ar tararé hoóde iin hítárar kosúrí noó, maa noóilé bafe dada ar dadallá ar górólla feth furer boli hoo. Borogún óo mojbur óizái zehón fuaindór duk deké. Añará bechíssa thaimot hoidé “hiñór baabote cinta nogorís- kélla”, · hiñor baabote hotá nohois – eskulor ham goró”, “ hoorot fecák nogorís – tui boro óiyóss ehón·, “ tor báiyóre no maris – tui ducto”. Lékin fuaindé ferecan ar hálíka búzé zodi tará kióllói hotá hoi noo faillé itará sinta gorédé hiñor baabote. Fuaindóttú itarar sinta oinno zonoré buzón zoruri.

Fuaindóttú ki laibó

- Maa bafóttú ar dhákor maincóttú fuaindór gaar ar demakor modot gorá ar kíyál ráka foribó.
- Fuaindólla sobór ar becí kíyálor zorurot.
- Fuaindóre buzái hoó foribó tará ki gorí faribó ar ki gorí nofaribó, saañza nogoribá. Itaráré rukó zodi itará hamlá goré noóilé ziníc bañga súra goille, lékin itaráré no maizzo ar sindá no maizzo.
- Fuaindóre mazé mazé itarár ate hañsé óddé hiñor baabote buzá foribó.
- Fuaindóttú niyom laibó. Fuain eskulot nozailéó ar maa baf ham no goilléó, gúmóttú sóhí thaimot uçá, hañná ha ar zendila nizor decót goizzil hendilla gorá zoruri.
- Fuaindóttú taaríf laibó. Tin bosórór fuaindoreyó kessú cúñçó cuñçó ham diya zaibó. Honó ekzonottú itaráré hiín zuroride hiíyaan buzai diya foribó.
- Fuaindóttú boro ókkólór modotor zorurot itárállá kéla ar oinno lorsorar ziníc tuai dibollá. Boró ókkólé zodi fuñati zai faille gom óibó fuaindé héfázot taibollá. Kéla loi fuaindé dukkór sintaré fúrai félár kucíc goré.
- Fuaindé tarár ferecani, tará zin maásusgoré, tará zin sinta goré hiñor baabote hotá hoilé fúinnó. Ferecani cíyar górá ar hotá hówa zoruri.

Fuaindé añará buzidé héttuñaró becí kíyál goré

Fuaindé tarár ate hañsé ódde hinór asólé hodún bozí faré? Añará boro ókkóllóllá fuaindé hodún buzé hin zana becí mockil. Ebbe cóçó fuaindé úddá tarár ate hañse óddé ar hoódde hiin rejisthar goré. Boro fuaindé óitfare nizámmárí táké, hétolla añará buzí nofarí tará ki sinta goré tará ate hañsé óddé hínór baabote.

Kessú thaimot boro ókkólé laráir hótá, polisor acanok hámla, yá decór baaré defeçaiyéde hiñór hótarar baabote fúné. Oinno thaimot fuaindé nizeó dorade ziníc ókkólór loot faiyé – ar noóilé tarár maa baf ar fémlir manúicor uore óiyéde hinózzoria hítaráttú ekkán dor táké. Boc zendilla óibó óok, doror hálót, doror tojruba ar noóilé ferecanir hóbór demakot lagi táké ar nizor bútoré ekkán dor ar ferecani óo.

Dái zágoi fóredé fuaindór tin daból mockil ar sótma óo:

- Hítará bóut duk faitáke nizor decót ar dáibáiccot.
- Hítará egaza sótma ar ocantit aséde maa bafor fuñati také.
- Fuaindolláyó faná saiyéde éçiyar zindegir hálót larait óiyedé hínóóttwaro becí doñr mockilor hotá.



Fuaindór uore asór

Fuaindé hotá hoi nofailléyó, dhoilla bodhoilla torikaloi tará sinta goréddé hiin "hoó". Icará gorí ar noóilé gaar losorá gorí itarár ferecani añararé "hoibár" kucic goré. Ze fuaindé dor ar sótma faa, hé fuaindór yiin kessú aam lorasora.

- **Gúmór mockil.** Fuaindé hóraf kúab déké noóilé guñça rait gúm zai nofaré. Hítarattú ada raítta gúm bañgi zagóí yátu hítarare bisanot raíle hañdibo. Boótzona bisanot no zaa.
- **Demakor biaram.** Fuaindé háná noháibó, oolibó, háná hom háibó noóilé becí hái fetoth dupfaibó. Gaar bóut zagat sissiaibó.
- Ferecani. Fuain ferecanit taáibó. Itará egaza hañdibó. Itará kélaító nosaibó ar be-rokbot tákibó.
- Eskulor kúantí. Dhíyán gorí nofaríbo ar ocantít tákibó. Fuain ókkól nizám notáké ar ate hañsér ziníc bañgi felé.
- Gáañrai. Mara mari, mairfit, oinno fuainloi ar boro ókkólloi hoijja góré. Becí híssa fuaindé dorade hetolla yin goré.
- Dor ar cinta. Fuaindé abasoré ar yunífform ólá manúiccóré ar ze ciz ya manúic tararé dukkor hotá monot goraíde itararé dora. Oinno fuain ókkól ferecan óo ar kélaító nosaa.
- Kessú fuaindór hotá buzítí mockil óo ar túta.

íín beggún fuain zinóttú zindigít mazé mockil óiyé itarár lorasora. Bar bár doror mamla, bar bár dáдай górá fuaindóllá ohéfázotí banai. Héndilla óhéfázotor zoriya fuaindóttú dor óo. Itará maa bafottú duré zagóí fóribó bóli dora, abáró duk faibo boli dora.



Doñr fuaindé fool óizáibó bóli dora ar itará ki sinta goré oinno kíoré hoitó nosaa. Añará boro ókkólor zimma, itararé zanaidon. Aage problem óiyéde hètolla endilla óiyéde, ar yíin asté asté gom óizaijó. Zodi gom nooilé honó ekzonor modot luaforibó. Mesál sehétor naas, daktor, demakor mahér, noóilé mastor.

Guñça fémiliré asór góré

Fuaindór endilla lorasora maa bafollá soñlá óránór ham. Maa baf asanissáte fuaindór uore guccá óo, háas górí ze maa baf nizéó hóran óiye ar dorot mazé asé. Guzora guzori goillé fuaindé aró becí bezar oibó ar ohéfázót sinta goribó. Oinno maa baf zin endilla halotot asé itarállói hotá hon zoruri. Ze fuain ókkól decóttú dai aafóizze itará tararé ador goittódé manúic ókkóloré monot goré ar ze zagaa itaráttú kuwaic lagitú hiinór baabote hotá húwa mockil. Añará maa baf ókkóllayó dukkor ziníc monot gorá mockil, ar añarállyó nizor fuaindóré keengórí cantí diyúm hiin zana becí mockil. Añará maa baf saidé fuaindór honó nuksan no gorá. Fuain aró becí ferecan óibó bóli dore añrá dukkor hotá nohoói.